

四庫全書

史部

欽定四庫全書

史部

江西通志卷六十一

詳校官監察御史臣左周

檢討臣德生覆勘

總校官知縣

臣

楊懋珩

校對官典簿

臣

劉景岳

謄錄監生

臣

何銓

欽定四庫全書

江西通志卷六十一

名宦

五

臨江府

吳

周瑜字公瑾廬江舒人也建安中孫策定豫章廬陵瑜

留鎮巴丘

吳書

萬或寶鼎二年以右丞相出鎮巴丘

林志

宋

王懿字仲德武帝伐廣固用懿為前驅戰輒破之帝與  
盧循戰於左里懿功冠諸將封新淦縣侯

南史

隋

李子樂開皇十年令新淦廢石陽巴丘二縣入新淦隸  
吉州子樂以縣治去州遠徙南市村相土卜宅於今

為烈

臨江府志

唐

杜臻大厯間攝新喻令初縣治左龍池墅大水城圯郡  
守李嘉祐建議遷之臻擇形勢因徙縣治於虎瞰山

之北

明一統志

李筠天祐間令新淦會邑陞都制置治所割吉水新喻  
豐城三縣隸之筠興版築高城壁遂為雄鎮

林志

五代

李著為新喻簿攝縣事時縣多火災著率公徒撲滅之  
民居故覆茅且侵官街著諭民盡換瓦又浚古湮井

六自是火不復作

明一統志

宋

韓振開寶元年為新淦制置使以新定三縣事繁時樊知古充採訪使遂申乞以所屬刑獄關覆吉州而制

置司罷

林志

羅開滿字仲謙會稽人開寶間守臨江崇儒尚禮贈臨

江侯

同上

龐籍字醇之單州武城人及進士第為言官彈劾無所

避孔道輔曰言官多觀望宰相意獨龐醇之天子御史也坐貶知臨江軍治郡有聲尋復官徙福建轉運

使

宋史

呂大防字微仲藍田人嘉祐進士熙寧四年以太常博士知臨江軍未幾徙知華州拜尚書右丞

同上

王說字巖夫開封人為臨江守郡有冤獄多所平反

同上

上

按前志載呂嘉問為臨江守王荊公以詩送之云

黃雀有頭顱長行萬里餘想因君出守暫得免苞  
苴又引宋史嘉問本傳辨其歷官無出守臨江語  
而據荊公詩以為本傳失載云考通鑑熙寧三年  
呂公弼以安石變法具疏將論之從孫嘉問竊其  
藁以示安石安石先白之帝怒遂罷公弼知太原  
府呂氏號嘉問為家賊如此人即有美政亦不當  
以列名宦況絕無政績可紀邪其諂事荊公自宜  
有詩相送何足為重今特削去



張好古字敏求南康人元祐間知新淦莅官勤敏革弊

舉廢衆服其廉

林志

林冲之字和叔莆田人元符進士宣和間知臨江軍會  
漕司議廣東海艫數諸路以守令數豐殺為殿最  
時僧多蕩產民亦告病冲之措置有方夙弊盡革靖  
康初擢主客郎中介中書侍郎陳過庭使金同被執  
抗節不屈而死

宋史

李之邵建康人建炎初為新喻武尉隆祐太后幸虔州

扈從後軍以糧運不至則所過燔掠遂為叛之邵拒之兵敗不屈大罵賊賊殺之賊酋壯其言誅害邵者

邑人立祠

明一統志

張著字少微處州龍泉人紹興初知臨江軍政事嚴明吏民畏服時兵荒之餘鮮服儒業著與文崇教建學舍為文以勸誘之士因知學值大旱有吉州豪民歐陽建光謀溺北客者私其妻事洩移獄推鞠著廉實發槌獄決而雨

林志

張遇紹興間新淦縣丞時方被兵令不能職撫諭使張  
漙劾罷之以遇攝縣事遇撥煨燼考版籍正租賦數  
月之間弊除而民定

豫章書

孔端木字子公知臨江軍崇教化士風丕振與張著並

祀府學

明一統志

汪杲紹興間知新淦作新學校文風大振淦之士獨盛

於他邑者杲之力也

同上

江溥字叔源信安人乾道間知臨江軍值歲歉講明荒

金卷之十一  
政為糜粥以食飢者民賴以活豪民鍾氏武斷鄉曲

溥發其奸寘於法人稱快焉

同上

沈詵字直之吳興人淳熙間知臨江軍嘗買民地以廣貢院又翻刻二劉春秋傳權衡意林於郡學官至戶

部尚書

林志

陳士楚字英仲淳熙間為司戶時新喻稅籍不明豪右多佚賦而累貧士楚督儲至邑悉正稅籍吏胥不能欺仕至起居舍人

同上

何洪慶元間知新淦縣崇尚禮教不施鞭扑而民自畏服值邑大疫癘置惠民局延良醫以治之又置養濟院以收無依者民甚德焉

豫章書

王蓬字少愚濡湏人慶元間知臨江軍故郡市黃雀鮓歲遺朝貴率三萬計蓬至悉罷之免萬里苞苴之勞政聲上聞召還去之日凡供張物器悉歸公帑秋毫不隨仕至戶部侍郎

林志

趙師道字載道通判臨江軍以貢闈窄隘因申郡漕開

拓之又括在官之田置貢士莊以助偕計吏者

府志

丁必稱字季言蘄州人知臨江軍江西和買例以稅產均敷其無稅者以物力稱因積郡帑之贏代輸物力和買一年為錢若干文乃請於朝乞永與蠲免擢潼

川提點刑獄

林志

黃幹字直卿福州閩縣人朱子高弟嘉定間趙希懌提舉江西辟為臨川令歲旱勸糶捕蝗極其力改知新淦縣吏民習知臨川之政皆不令而政行所至重庠

序先教養舊欠綱米數萬石幹聞於朝悉罷免之擢

監尚書六部門

宋史

葉師中字子實永嘉人嘉定中教授郡學積廩餼之餘

買田為義廩以資仕進之貧及衣纓後之不振者

林

志

黃自然字元輔建安人嘉定末教授郡學以理學誨諸生齋宿問辨率至夜分及漕廣西猶捐俸餘助修禮

殿官至吏部侍郎

同上

王伯大字幼學福州人嘉定七年進士知臨江軍歲饑賑荒有法遷國子監丞累官資政殿學士

宋史

按府志伯大置荒政局延士客究竟古今賑濟便宜法抄刷戶口全活甚衆所著有救荒案賑民錄時民有紅黃黑白圈甲乙丙丁戶若非王知軍餓殺人無數之謠

潘剛中字濟叔臨安人知臨江軍時郡堤水齧行者莫濟剛中出緡錢疊石畚築易為坦塗又置抵當庫貯



公費使來者修築馬

林志

張礪字渭老福州人嘉定四年進士鄰郡有清江渡產紙部牒誤為清江縣下郡日鈔會紙三萬時礪知臨

江申省辨之乃得報罷

同上

按宋史本傳礪由嘉定進士歷官至刑部尚書拜參知政事並無知臨江軍事姑從舊志以俟再考陳日強吳興人知臨江軍首鋤豪霸劾貪令訟簡刑清

一郡肅然

同上

陳容字公儲長樂人端平二年進士嘉熙間通判臨江軍以才名受知理宗入為國子監主簿去後人常思

之

府志

鮑廉德祐初知臨江軍歲乙亥元將巴延阿珠下九江分兵攻臨江或勸之避廉曰城亡與亡可遁乎被執

死之

林志

元

李侗字士弘河東人大德間為臨江路總管民病火災

倜儻來循行賑飢濟溺懇禱於神秋果大熟郡有奸民不便其所為誣訟倜儻職去明年宣撫至郡民數百人為倜儻屈得直其冤官至集賢學士卒謚章肅

林志

茂巴爾字世明至正初守郡崇儒興學愛民如子卒於官民哀之聲動城邑立祠祀之

同上

烏呼納色自人元末為臨江路經歷臨江故多虎狼之卒居城郭者咸執鞭為業民忤之者必中以奇禍獄

訟興滅皆出其喜怒百姓側足畏避號曰笳鼓謂其  
部黨衆而心力齊也月忽難初至訪民瘼按宿獄凡  
壅滯不決者皆笳鼓之徒為之悉逮捕窮其奸狀餘  
黨斂跡退散農民入城市相謂曰微經歷我與爾敢  
來此乎見劉誠意集

豫章書

明

劉貞字子貞洪武初知臨江府時元末兵燬貞撫字有  
方百廢具舉民不知勞以循良稱

明一統志

趙天麟東平人明初同知臨江陳友諒遣知院蔣必勝  
寇臨江城陷被執不屈死之贈天水郡伯立祠肖像

於南昌有太平金鏡集八卷

府志

楊成成都人建文間以刑部郎中謫知新喻縣性耿介

剽繁治劇事無留滯仕終福建參議

明一統志

聞祿永樂初通判臨江操守堅正蒞政公勤潔已勤事

民受其惠尋陞太原知府

同上

金輝永樂初為臨江推官見事敏給蒞政詳明持已儉

約待人寬恕以薦擢監察御史

同上

李存仁黃巖人永樂間知新喻縣廉幹有機局初抵任  
佯為不知狀逾月閭里銖兩之奸悉知之一時豪右  
摧抑淨盡境內大治民所告訴判斷如流有兩牛相  
鬪一牛死主者訟之判曰二牛相鬪一死一生生者  
同畊死者同烹又有慢命者拘其母不出既而執其  
妻即出曰慢命罪小不孝罪大杖殺之其不煩鞠責  
而事自理凡此類也

林志

朱得寶抵人永樂進士知臨江府政尚寬平歲滿上章  
乞留者數百人詔陞右參政仍掌府事歷任凡二十

四載

府志

沈榮字元節平湖人天順進士知臨江府政尚嚴明吏

民畏服學問博洽尤善吟咏尋擢貴州參政

林志

夏璣字德乾吳縣人天順進士知新淦縣持身清慎平

易近民有古良吏風擢監察御史

明一統志

王佐臨臯人由舉人成化間同知臨江公平正大博學

工吟咏以才能著稱

林志

葉淇山陽人成化進士知清江縣政平訟理民不忍欺

擢監察御史累官戶部尚書

同上

張善昭順德人弘治間由四川僉事謫臨江通判先是

練子寧親黨謫臨江者八十餘人善昭上書曰子寧

忠貫日月太宗謂若使子寧在朕固當用之仁宗亦

謂方孝孺等忠臣夫既忠之矣何肺腑外屬尚以奸

惡賜配百年不宥哉疏雖不行中外皆壯之

白志



盧翊常熟人弘治進士知新喻縣廉不近名仁不墮事

和平豈弟有循吏風

林志

戴德孺字子良臨海人弘治進士歷工部員外郎遷臨江知府宸濠反遣使收府印德孺斬之與家人誓曰吾死守孤城脫有急若輩沈池中吾不負國也即日戒嚴與都御史王守仁共滅宸濠以憂去世宗以德孺馭軍最整獨增三秩為雲南右布政使舟次徐州覆水死後贈光祿寺卿予一子官

白志

陳元憲連江人正德間通判臨江政尚廉平催科中存撫字門第清嚴關節不能入去任十載民思之如初

林志

吳宗周字良弼宣城人丞相潛之後少以孝行旌於鄉舉弘治進士知臨江府首重師儒郡先有三教坊以佛老並僊文廟命毀之撤其材為號舍以聚生徒嘗延莆田陳璵講五禮圖式數年民知禮讓郡中稱治

府志

王泰慈谿人由鄉貢正德間為清江縣舊以里甲值日  
科取無度泰至除十之七會部使督餉急泰曰知縣  
可辱吾民不可迫建倉備饑財力不取於民卒於官  
無以為斂知府戴德孺經理其事士民哀之

林志

徐問字用中武進人弘治進士以登州知府調臨江民  
病水潦為築隄防七十二轉長蘆鹽運使歷官至戶  
部尚書卒於家問清標絕俗居官四十年敝廬蕭然  
田不滿百好學不倦粹然深造為士類所宗

白志

朱簠字守貴山陰人嘉靖進士知峽江縣時峽初闢邑  
簠以寬仁撫循採辦皇木單騎入山民無紛擾其課  
士尤勤雖窮鄉誘民使學士至今思之

安志

徐宗魯字希曾華亭人嘉靖進士任峽江有惠政丈田  
滌虛稅禱旱跽烈日中祝曰天寧殃我毋災百姓蝗  
蔽野躬自督捕徑疏請蠲租民賴蘇息歷三載鬚髮

盡白

府志

樂舜賓定海人嘉靖進士知新淦縣值海寇奄至舜賓

登陴拒守創立藥弩殲其渠賊宵遁明年大水城圯  
舜賓斃之以憂去

同上

徐顥字子淳錢塘人進士知臨江府庶政修舉尤屬意  
文教發奸摘伏如神吏民莫敢欺勢家抵禁必置之  
法貴人請託輒拒之曰寧負權臣不負吾民以考績

赴京歸卒

安志

錢琦字公良海鹽人進士刑部郎中知臨江府凡事當  
行罷擇民所便即任之改作公堂民無煩苦又念新

淦地廣民悍當析邑分治力請於朝峽江始立縣經  
營建置酌定賦役悉出手畫已又奏請輕齎三年以

寬新邑未行

同上

李易字仲占永興人嘉靖進士以戶部郎出守臨江儉  
樸勤慎與人無阿聞善益親嘗作後堂署體仁以見  
志年荒設糜救飢仍賑米城北高橋圯涉者多溺捐  
俸倡修無子橋成舉一子人以為陰德之報云官至

叅政

同上

廖文光字士龍上元人舉人授清江令時嚴嵩執政光擒其橫僕置之法轉廣信同知郡有商被盜幾死有神呼之告於廖商隨投告獲盜抵罪晉戶部員外郎

江南通志

黃尚質字宗商水軍左衛人嘉靖舉人知峽江縣驛有羨金歲暮輸縣尚質令存以減來歲額派聞練子寧遺嗣流為廝養多方寬之復其姓立祠買田俾主其祀同上

曾陳易號東陽番禺人進士治淦邑多善政務簡易近  
民自題其堂曰易事難悅嘗重新學宮請恤驛遞疲  
困例增餽銀淦歲苦南北二米乃酌糧數派編矢心  
公慎雖豪貴勢家無所規避尋陞御史淦民懷之立  
祠祀焉

廣東通志

李茂英寶應人進士初選分宜再調清江愛民好士清  
驛遞均徭役尤留心荒政倣古常平之法又建文昌  
閣於學宮之左規制壯麗自是士子多登第者歷官



通政

江南通志

王圻字元翰上海人嘉靖乙丑進士為清江令邑田糧多欺隱歲久弊積圻躬歷阡陌素精勾股法丈量圖冊既成胥吏無敢作奸者尤銳意右文置學田增號舍鑄祭器刻繩尺論以訓士為時所稱調萬安令

上

按江南通志稱圻調萬安後擢御史忤時相累官至參議乞養歸築室淞江之濱種梅萬樹目曰梅

花源年逾耄耄猶篝燈帳中丙夜不輟有續文獻  
通考諸書行世

管大勲字世臣鄞縣人由進士選庶吉士改禮科給事  
中出知臨江府政尚循良表章經籍興復古學建明  
經書院增號舍置學田修葺郡志考據精當能以文  
事飭吏治

同上

李樂字彥和烏程人隆慶進士知新淦縣初謁郡守閻  
人素驕蹇不率樂先杖之而後以聞邑中肅然淦賦

繁申請條鞭畫一民便輸納創尊經閣建便民倉捐俸市穀以備荒賑在任布袍蔬食數年如一日擢給事中有金川紀事

安志

張師繹字夢澤武進人萬歷進士知新喻縣以簡易寬大為治嘗奉檄督逋賦歎曰賦逋至十年籍不可考矣徒為老胥奸利地何益竟不行喻邑有銀監稅璫至橫甚師繹為書一法字授璫前驅璫懼遂去後仕至按察使

同上

鄭朝棟號二水醴陵人萬厯中由鄉薦官臨江同知精練明敏姦宄屏息四視邑篆俱有惠政丙辰沙河堤決臺司委督其事度形勢均工役木石畚鍤之具親先調度隄成堅固至今賴之仕至貴州布政使

府志

郭惟賢字哲卿晉江人萬厯進士授清江令邑郵多逋

額惟賢酌定驛規申緩夏秋稅期民得甦息俗好訟

嚴令禁止最聞擢御史

安志

李徵儀字于來廣德州人萬厯進士初令弋陽調清江

解戶南允苦重費乃立官解之法盡革加派包匿諸

弊嘗築鍾家園隄護田萬餘頃陞禮部主事

府志

賀逢舜益陽人萬厯進士知峽江縣邑地瘠賦重逢舜  
請於臺使奏減例銀千餘兩酌起運緩急立八限以  
寬民力丁糧銀米悉載定冊刊定糧差條例吏胥不  
得上下其手秩滿陞戶部主事

同上

楊宏科字意白餘姚人萬厯進士為新淦令時凶荒游  
至宏科散財發粟極力撫循之盜賊流劫諸鄉捕治

其首惡無所株蔓淦賴以安擢監察御史

同上

張汝霖字肅之山陰人萬厯進士初授廣昌令調清江  
時朝議方興礦稅民惶懼汝霖條上利害為民請命  
尋中使採買樟鎮藥材民復大擾亦賴汝霖撫諭乃  
定擢兵部主事

同上

俞誨字忠伯莆田人萬厯進士知新喻縣廉靜慈惠嘗  
閱南灘水勢背郭形勝非宜乃鑿引秀水抱城東下  
至今呼為俞公河在任凡九載民被其澤擢御史

同

上

朱邦禎號恬宇吳縣人萬歷進士知新淦縣邑素苦經  
催疲運乃條陳船戶代解民困以甦又擒治巨盜數  
十人修便民倉鑿桂湖民大賴之日進諸生談說經  
藝有金川會課集陞大理評事

同上

林恭章莆田人萬歷進士補新淦令有能聲額賦聽民  
自納不取羨餘貧民有鬻妻者賑之使完聚邑火捐  
粟卹被災者尋陞江西湖東道

安志

鄧林楠字光宇三水人以明經為新淦令性恬淡均賦  
平訟義利贖鍰一無所入邑夫馬歲苦偏累林楠分  
衆朋充民以無擾以資格為臺使所抑士民皆惜其  
去

同上

劉拯字以仁永福人由舉人為新淦令嘗因漕蠹侵折  
運輓不前力請民徵官解一時便之崇禎中流寇充  
斥淦城卑小拯加高數尺尤銳意文教置學田修敬  
一亭文昌閣勉齋祠士興於學以陞任去

同上



盧兆龍字侯見香山人天啟進士授清江令精練明敏  
案無留牘時征調漸繁兆龍供應無乏而民不病樟  
鎮濱江歲患衝齧兆龍築石岸護蛇溪諸水鎮人以  
安擢禮科給事中

府志

陳以運字時可貴池人由舉人為新淦令淦邑南北輓  
運歲為船戶冒破以運條請徵解自是官民免於累  
時江楚多事臨素諸郡騷動以運繕城濠建倉庾以  
受委積邑有數年之備盤山土寇起即率兵擒斬之

焚其巢崇禎間闖賊大掠鄰邑以運多置間諜修甲仗團練義勇為死守計卒全其城以膽略稱遷邵武

同知

安志

梁士濟字遂良南海人天啓進士授奉新令調清江會楚中用兵芻餉徵給拮据應辦壬申峒寇作分守道欲撤城外居民持不可曰脫寇至燔之無怨矣乃自出簡精銳扼諸河上民賴以安又置學田贍士請廣弟子員及科舉例士子翕然歸之擢監察御史

府志

秦鏞字大音無錫人崇禎進士清江令邑素僉富民為  
馬戶富民竄入胥吏希免累及貧戶鏞以胥吏僉而  
給其直民困頓蘇劇盜嘯聚沃場等處以計擒斬之  
築梅家畝建義倉釐正祀典作五勸四誠歌以教民  
力穡內陞御史

同上

國朝

潘岭號石丈孝感人順治戊子拔貢任新淦縣兵燹後  
百事草創鼎建文廟重建讀書臺及坑口渡橋增築

城垣清丈荒田招來頑梗士民賴之

新淦志

于鵬翰字六息文登人順治乙未進士知峽江縣性仁廉時軍馬絡繹民不堪命鵬翰捐貲募夫民乃不擾多方招撫嘗賣所乘馬給民牛種勸畊作詳免荒徭峽民德之

白志

符執桓山西翼城人康熙二年由舉人知新喻兵後縣治毀民流亡田半蒿萊執桓構材飭廳事及吏舍歷勘荒畝疏逋賦之無主者聞於大吏卒得蠲除流民

歸業捐給牛種饑則賑粥民賴休息內擢未任卒士  
民痛惜之

新喻縣志

胡之琳號介石淳安人由舉人知新淦縣修葺學宮及  
便民倉惜陰書院復陶桓公黃勉齋祠纂郡邑志卒

官

新淦志

喻成龍遼東人康熙二十六年任臨江知府廉明仁愛  
風節自勵鼓舞學校以隨行經籍數千卷置尊經閣  
建褒忠祠表彰孝義節烈舊例漕米解戶率破產成

龍令官收官解百姓便之歷官湖廣總督

臨江崇祀

志

李濤字紫瀾德州衛人康熙丙辰進士二十八年由編修知臨江府行潔品端風清弊絕甫至廉得巨盜張茂生者沿江剽劫為民害縛至通衢立斃之擒餘黨曾翕李老生等悉置之法民歡聲雷動清江奸胥收民稅持權衡以機械暗移輕重濤過縣門叱吏突至其處得奸狀伏法酌定引鹽價值嚴禁鋪戶供應每

歲奏銷冊籍當年里長為費不貲濤盡革除民尤便之在任九年陞浙江鹽運使歷官刑部侍郎

白志

### 吉安府

#### 三國

孫輔字國儀以揚武校尉佐孫策平三郡策西襲廬江太守劉勲輔隨從身先士卒有功策立輔為廬陵太守撫定屬城分置長吏遷平南將軍

三國吳宗室傳

劉陵為安成長先是境內多虎民患之多徙他郡陵至

修政月餘虎皆出境流民復還

明一統志

吳碭為安成長孫權使呂岱取長沙碭據縣以拒權遣  
魯肅攻圍碭突出曰碭受天子為長知有漢而不知

有吳也

同上

晉

郭察永嘉中為安成太守時益梁流寇破零桂諸郡進

逼安成察力戰死之

林志

虞潭字思奧會稽餘姚人領廬陵太守撫綏荒餘咸得



其所又與諸軍共平陳恢仍轉南康太守進爵東鄉侯時湘川賊杜弢勢猖獗江州刺史衛展因表潭并領安成太守以禦之

晉書

按前志載孟嘉辟部廬陵從事還都庾亮引問風俗得失對曰還傳當問吏亮舉麈尾掩口而笑謂弟翼曰孟嘉故是盛德人此在晉時風流相賞實不可以稱名宦也故去之

宋

劉湛字弘仁南陽人為廬陵王義真長史時王居高祖  
憂使帳下備膳湛禁之義真乃使左右索魚肉珍羞  
於齋內別立厨帳會湛入因命庖人進酒及車螯湛  
正色曰公當今不宜有此設義真曰一盃酒亦何傷  
湛起曰既不能以禮自處又不能以禮處人遂趨出  
景平元年台拜尚書吏部郎

宋書

按前志載周朗為廬陵內史郡界荒蕪頗有野獸  
母薛氏欲見獵乃合圍縱火令母觀之火延燒郡

解朗悉以糴米起屋償所燒之限稱疾去官為州  
司所糾自劾以猛獸三食人蟲鼠犯稼為已罪如  
此舉動似不可列名宦酌去之

梁

傅昭字茂遠靈州人由左民尚書出為信武將軍安成  
內史安成自宋來兵亂相接郡多鬼怪及昭為郡郡  
人夜夢見兵馬鎧甲甚盛又聞有人云當避善人軍  
衆相與騰虛而逝自後郡舍遂安咸謂昭正直所致

郡溪無魚或有暑月薦昭魚者昭不納魚餒於門側  
梁書

江革字休映濟陽人為廬陵長史以清嚴為百城所憚  
時少主惑於籤師革正直自居不與籤師等同坐俄

遷左光祿大夫

同上

陳

劉竺彭城人廬陵太守沉幾博照利興害除公家勘負  
租私家多餘貨出郊有白鹿隨馭之祥民懷惠政立

祠神岡山 豫章書

唐

張儼元和間為廬陵縣令廉惠通敏彈擊豪黠撫恤細民嘗捐俸掩骼招復流離民有兄弟相訐者儼解諭令其相好如初連歲大穰皇甫湜稱其恂恂奉上煦煦字民蓋實錄也

廬陵志

賀憑會稽人集賢學士知章之後會昌四年以著作郎任永新令有惠政秩滿當去邑民遮留之因家焉

永

新志

卷六十一

田陽字昭和大中間任吉州刺史留心撫恤物阜民和  
卒於官臨終與子訣曰吾死不忘護吉州之民子感  
其言因家於吉之城北立祠祀之至今有田相公廟  
林志

蕭為長安人乾寧進士任吉州牧養民以仁待士以禮  
政平訟理結庵金鳳山岡講老子書自號蕭道人既  
解任即庵立祠祀之水旱疾疫必禱焉

林志

南唐

李元清濠州人開寶中以吉州永新與潭衡接境因改  
永新為制置以元清為使每數月潛入潭部託病不  
衙人不之知先是夏賦準貢見緡民苦之元清奏請  
納帛一疋折錢一千以為定制民便之嘗減冗費十  
萬餘漕運入金陵以濟國用

馬令南唐書

按明一統志李元清作楊元清

陳省躬知永新縣明察有斷部民交訟曲直立分時郴

衡盜入境防戍兵多為所殺省躬給府緡市棺瘞之郡符下讓其專省躬判郡符云開官庫使官緡買棺木葬官軍何過之有

林志

按永新縣志云省躬三國時人林志則列名五代中在李元清後考三國志南唐書皆無其名今姑從林志

宋

王崇文建隆時吉州刺史奉法循理無所侵撓民便之



林志

龐敏建隆二年為泰和令徐錯撰白鶴觀碑稱其明察  
足以不欺貞固足以幹事

泰和志

董衢酸棗人乾德間宰永新以廉平著聲善類多所汲  
引任滿百姓遮道留之不得行遷殿中丞

林志

梁鼎太平興國間知吉州里有蕭甲者豪猾為民患鼎

暴其凶狀杖脊黥面徙遠郡太宗賞其強幹

明一統

志

戚綸字仲言應天楚丘人太平興國八年進士知泰和縣民險悍多構訟為諭民詩五十篇因時俗耳目之事以申規誨老幼多傳誦之每歲時必與獄囚約遣歸祀其先皆如期而還遷光祿丞

宋史

馬應昌至道間以右司諫來守廬陵鞠貪胥絕欺弊公

私舊逋官緡表奏折入吏民賴焉

林志

呂士元字佐堯江寧人咸平時為泰和令民喜鬪訟往往因事中吏以法多不免士元日與長吏爭曲直辨

情偽猾吏伺候終無豪髮過失可得祿食所入悉調

其族子溱隨侍至邑創讀書臺竟狀元及第

安志

按歐陽文忠誌士元墓曰官雖卑惠於其民足以  
為政祿雖薄周於其族足以為仁身雖不顯有子  
以大其門足以彰其為善之效

張岐建陽人明道間知永新縣治獄明允吏不敢欺民  
有積逋岐代補輸之

永新縣志

元絳字厚之錢塘人舉進士登第攝上元令有聲安撫

使范仲淹表其才知永新縣豪子龍聿誘少年周整  
飲博以技勝之計其貲折取上腴田立券久而整毋  
知之訟於縣縣索券為証則毋手印存弗受又訟於  
州皆不得直絳至毋又来訴絳視券呼謂聿曰券年  
月居印上是必得周毋他牘尾印而撰偽券續之耳

聿駭謝即日歸整田

宋史

何嗣昌為龍泉令嘗翔浮橋以通南北往來和蜀鄉有  
梅陂三百餘頃伐石立址興復水利民至今被其澤

馬

林志

李寬字伯強慶厯間知吉州承詔立學學徒常三百人  
又嘗施方略捕盜賊凡米鹽酒榷皆為民除弊致利

林志

王陶韶州曲江人唐宰相珪之後初珪子敬直尚南平  
公主坐事貶嶺南子孫留者寓曲江父式由進士知  
永新遷梅州陶博學有俊才登天聖五年進士慶厯  
元年知泰和縣興革利惠不局局簿書不揺惑於毀

譽縣署傾圯陶費錢百萬修之自為記

豫章書

按林志載王陶字樂道太原人考宋史王陶傳京兆萬年人不云太原且無知秦和事比讀王陶修縣署碑云予去秋被命私自便老親居曲江迎板輿度嶠北沿流疾下累日可至則陶明是粵人又考粵大記曲江有王陶歷官京東提刑度支郎所至著績而宋史萬年王陶則為御史中丞爵秩不符其為曲江人無疑

原跋

林積字公濟福建人慶厯進士由循州判改令安福建  
學聚徒親為訓督時有張嗣宗者煽妖術惑世積收  
繫之以聞妖遂息嘉祐元年秋旱積率吏民禱於石  
屋雨立至仕終河南轉運使

安福志

陸若濟字龍泉秩滿其妻詆之曰君洗手奉職不取一  
錢行道之人皆談清德茲罷歸寧亦載一清舟歸耶  
若濟曰非汝所知也人高其操

林志

葛源字宗聖麗水人以泰和簿攝吉水令吏舞弊者悉

置以法有毛氏寡婦告其子源以恩義說之不從密使人覘有與間語者捕得之乃謀誣其子者也窮治具服縣距州遠民輸租苦於輓運源始議置縣倉民至今賴之

泰和志

周郊錢塘人嘉祐六年擢第為吉水令訟至立判追召者皆朝裏糧而暮飯於家庭無留獄

林志

藍丞熙寧間守吉州時朝廷議行新法丞不欲病民以

年老乞致仕

同上



盛陶字仲叔鄭州人熙寧中宰泰和臨政剛毅不撓僥倖者不利之中以飛語邑人曾剛率邑中士力辨之未幾陶以才德擢御史

同上

許浹熙寧間知萬安縣扼姦戢欺釐革諸弊郭師元撫其實作許公十政詩刻石以傳

明一統志

陳汝器字適用元豐初令廬陵黃魯直稱其資性剛方剖斷無滯任法不避權貴牧民務去敗類其簿籍如謹細書生所鈔書以廬陵之難而稱治其賢可知

林

志

吳革元豐間知吉州先是郡增鹽課二百萬民已失生理前知府魏綸復上諸縣增課九十五萬革至盡罷之元祐初御史按察以革為江西第一

明一統志

李康成元豐二年為安福令修學舍集諸生講業時黃魯直為泰和令作詩寄之有孝慈民父母虎去蝗退

飛之句

林志

梅璠崇寧間為吉水令清強自許不事將迎提舉齊之

禮至邑以為簡已求所過責之所職之事應答無毫  
髮謬之禮歎賞而薦之朝頌其事於屬縣

同上

郭奉世大觀間為永新令時秦和民苦其令請諸上司  
願得奉世治其邑漕檄奉世往而永新民不可奉世  
乃寓兩縣之界無治之

明一統志

趙迪之字子開政和間知龍泉縣時金兵歲犯江浙郴  
虔南康盜起如蝟迪之先寇未至築古牛羊廢壘為  
寨廩貯悉具召募材武之士團結保伍為捍禦計虔

寇奄至相望一水間竟不敢犯

吉安府志

段縫至和間初析恩江鎮為永豐縣未有廳舍縫辟土

立廨規制治所有建縣治記

永豐志

趙訓之字誨道秦悼王五世孫政和進士建炎三年知  
吉州永豐縣孟太后避地虔州護衛統制杜彥等叛  
犯永豐訓之與尉陳自仁取間道繞賊後據地利匿  
其精兵以誘賊賊至伏發殲其衆會賊別校繼至官  
軍未成列自仁死之訓之殊死戰亦被害事聞贈朝

散郎直秘閣官其二子自仁贈通直郎官其一子邑

人為立祠

宋史

唐傑建炎間知萬安時金兵歲犯江浙羣盜蜂起傑倡

義募勇積糧糗設土軍維舟截江巡行捍禦戒令嚴

肅賊不敢犯

林志

蕭雅字汝正曲江人為吉水令政尚寬慈盜張仲添嘯聚劫掠阻水南渡未涉雅單騎往諭禍福賊執之將加害其徒曰善人也聽諭解去時歲饑白骨相望雅

貸錢給粟掩骼埋胔去之日民越境送者千餘人

同

上

李璆字西美紹興間知吉州時江西兵素悍璆始視事有相挺為亂者亟捕誅首謀撫循其餘大布恩信境

內遂安

宋史

呂源紹興間知吉州增壘浚濠嚴城設守吉之城池至

是始備

同上

鄭作肅紹興間知吉州在郡催科以正不阿時宰以病

民秩滿還朝論吉州失陷船纜錢事坐不法置獄會

秦檜死得免

同上

葉仁紹興間知吉州疾吏員冗濫乃按格律裁定其額

且刻石以告後人莫有敢易之者

同上

韓邦光歙州人紹興間為安福令軫民疾苦興利剔弊

王瀘溪暨太守王洋皆稱其廉

安志

陳則字準夫紹興間為泰和令奉身廉潔嚴而不苛時  
朝廷置免行錢郡賦之縣諸縣俯首聽命則獨廷爭

之故邑占數獨輕公暇課隸役種桑麻公圃中有勸  
民五事一盜賊二侈靡三詭戶飛產四不畊不蠶五

善惡之報

秦和志

張象先浚儀人紹興間知永新縣奏行經界法恪謹不  
懈終始如一日民愛戴之時永新賦有定制象先之  
力也

林志

趙錫衡州人紹興二十一年為吉安令政事簡易慈祥  
民稱為趙佛子贛州亂卒揚言入廬陵民欲避去錫



晏然攜酒山亭歡飲民心以安

吉安志

王正開封人紹興二十三年吉安令儉約自持公牒盈  
几一閱即得其情有餉以黃柑者止受一顆人服其

廉介

同上

李彌遜字似之吳縣人登大觀三年第紹興間以直寶  
文閣知吉州陞辭帝曰朕欲留卿大臣欲重試卿民  
事行召卿矣七年多惠政遷起居郎

宋史

蒲堯仁字彥性福唐人乾道六年知泰和廉白端謹無

秋毫失自奉尤薄嘗曰吾不欲以口腹累人間輟俸  
餘散之貧民不為儲積計縣宇火邑人環視歎曰得  
無為吾大夫憂乎出力新之不費縣官一錢居官三  
年去之日邑人爭齎錢帛送之一無所受龍圖學士  
胡鍾薦之曰所居民化所守不遷蓋實錄云

豫章書

徐若訥字不愚婺州人紹興進士為吉水令民有訟其  
兄析資不均者兄曰均弟曰不均若訥舉弟所得者  
與兄互易之二人悅服決事大抵如此

林志

陳臧孫字元甫天台人淳熙間為吉水令權攝帑藏催科有方未逾年公私兼足五鄉之人爭先而役尋請豁除虛租民甚德之

同上

胡長卿紹熙間守吉州先是太守江少虞置貢院於州西北糖倉巷時試者纔三千人乾道淳熙以後試者凡萬餘人往往有蹂踐之患長卿至乃與教授晁百談相視西北水軍廢營以廣之形勝倍昔仕進日顯士咸德之

林志

趙善諱慶元間守吉州政先無告嘗於具慶坊置慈幼  
院收恤孤弱命貢士王子俊許景陽等分纂八邑志  
以附於益公郡志之後由是吉之文獻彬彬足徵

上

陳緯台州人由太常丞出知吉州敬禮文丞相天祥丞  
相嘗與之書後遷福建司倉

豫章書

卓洵字士直長樂人慶元間知泰和縣留心水利創置  
沿溪六閘灌田萬畝民至今食其澤

泰和志

倪普金華人知吉州為政以風化為先嘗曰國之存亡  
民之死生寄於士大夫人品之高下世道由以重輕  
也州學舊有顏魯公祠普增祀姜公輔余靖名三賢  
祠人以為知治體

林志

按嘉熙間黃炳為萬安令會江西洞丁反炳集兵  
守禦忽五更報寇至炳遣迎敵衆曰枵腹奈何炳  
曰第速行飯隨至矣乃率吏攜竹籬木桶沿市門  
呼曰知縣買飯時晨炊方熟厚酌其直負之以行

於是兵皆飽食一鼓破賊以功擢臨川守如此應  
變之才實宜特書而前志入黃炳於撫州名宦中  
不載破賊事今補附於此

元

岳天禎大名冠氏人岳存之子襲父職以平賊功授昭  
勇大將軍福州路總管秩滿改吉州路總管平永新  
賊後遷贛州

元史岳存傳

張懋字子美涿州范陽人至元十六年授懷遠大將軍

吉州路總管惡衣糲食率之以儉慎刑平政處之以  
公新府治設義倉雖能吏不過也部使者劉宣黜之  
凡有所懲治朝至夕報豪強竦然郡萬戶蘇良恃勢  
為暴為之翼者有十虎之目民甚苦之乃上其實於  
憲府盡誅十虎者民大悅羣盜有率衆將白晝劫城  
者懋聞之率從騎擣其穴縛其酋長以歸民之流亡  
來歸者數千家相率為生祠以祀之卒謚宣敏

元史

按林志誤為睢陽人

吳繹字思可信都人泰定間自杭移守吉州政有三善  
外敏而內寬一也讀書知治體二也好謀而善斷三  
也

豫章書

張翥濟寧人為吉州路總管時龍泉大笄山寇起翥收  
捕之民賴以安陞廣東廉訪使

同上

張楫以忠翊校尉知吉水時民初歸附衆心洶洶楫鎮

壓軍馬勦除盜賊民安堵如故

林志

達爾瑪實哩高昌人監泰和州廉明剛毅民望而畏之



鋤強激義禦寇有備每夜親率士卒巡城巡江中夜  
乃歸復篝燈讀易不寐寇陷吉州民皆瓦解泰和賴  
以得安逾年卒官吉民思之繪像以祀

同上

寶通為廬陵達嚕噶齊盜陷郡城寶通監守不屈集義  
士力戰殺賊甚衆廬陵復安至今人慕其德

豫章書

梁克中吉安路總管四境盜起克中即移兵出鎮於郡  
東大洲上修濠樹柵為營壘益募丁壯置舟師節制  
屬縣義兵民賴以安

明一統志

蕭同善知萬安至正間彭時中寇縣境同善與縣尉荆世傑集義士守禦閱歲甲午時中復攻縣城同善督衆力戰城陷死之

林志

何綽爾齊郊縣人至元年間監泰和州時西鄙之民不靖官兵欲夸及無辜綽爾齊白都統曰城內外皆良民其不順者西鄙也乃引兵西屠一邑得免民祠祀之同上

明

顧文昱字光遠嘉定人高帝下江南文昱時為京口掾  
首納款遂從帝入金陵授江西行省理問甲辰平陳  
氏擢知龍陽州改知泰和州前知州吳去疾以民好  
訟告文昱文昱乃自為書榜聯紙長數丈誨諭諄切  
民爭來觀觀已去不訟者十二又俾凡訟者居譙門  
上思三日然後得訴思不三日去不訟者過半乃擇  
吏淳謹者一人置簿受詞民誠負冤輒為疏理非誠  
負冤願悔自止者聽不問未兩月民不復訟境有虎

會其時禁民私蓄兵民無所措文昱為檄告神虎一  
夕去州大治以丁祖母憂赴闕陞辭留翰林院同編  
大明律仕至廣東行省郎中文昱嘗從楊仲弘學詩  
自號蔗境翁詩數卷題曰蔗翁吟藁

豫章書

按林志作顏文昱謚

潘景岳洪武初為安福州判官兵下安福景岳言於主  
將得所掠男女千人分置空舍飼以糜粥俱遣還家  
同上

劉昭先字宗啟洪武初舉人為御史三年以嘉議大夫  
知泰和縣事政尚清簡未嘗疾言遽色事至隨應上不  
負公下不煩民新城隍祠及山川風雲雷雨社稷  
等壇又修稅課局惠民藥局嘗聘邑人楊自立等為  
學弟子師多所成就去之日民庶攀送者千人歷官

禮部尚書

同上

莫己知鳳陽人洪武初知吉安府時天下甫定郡縣規  
制率苟簡未備己知加意振刷興仆立踣煥然改觀

持已廉重待民慈惠民甚安之

安志

田盛字秀實明初任永新知州廉介有智時亂後民多  
逃徙盛多方拊循歸者咸獲安堵修整學校重建殿

廡門堂又割俸置祭器以興文教聿成新治

同上

高德賢汝寧人明初知龍泉縣兵後阻饑募富民出粟  
設東西二坊賑活數千人新公解修學舍增廣生徒

身督訓之

林志

夏杙滁州人明初守禦千戶亂後務存休息平南里寇

又平西寇繕城池新堂廨修學宮及古陂梁政蹟甚多

安福志

馮勝淮東人洪武初知萬安縣剛明果斷時龍泉盜彭舉之黨聚險方命勝率贛軍捕治之又招諭殘民開墾田野建學造士凡祀神壇壝以次飭治一新

林志

謝子木溫州人洪武間知龍泉縣虔寇蟠結每來寇境子木奏發兵勦之民始寧居均賦役勤稼穡縣以大

裕

同上

於仲寬黃巖人洪武間知永新縣南鄉龍氏聚寇為亂  
千戶所官幸捕盜為利欲盡屠之仲寬力止躬率鄉  
兵執盜魁治之寇平南鄉人感之若父母生子多以

於姓為名

同上

烏斯道鄞縣人洪武九年知永新縣事廉靜有守民不  
忍欺工文章邑士多從受經至今人誦而懷之

豫章

書

趙彥剛福建人洪武間知萬安縣廉靜簡約興學勸農



均賦役革吏蠹民訟盈庭立剖決之邑西南寇起親  
征撫之賊不為患民賴以安去任惟兩敝篋而已

府志

志

錢本忠

一作中

武進人洪武中知吉水縣有廉名註誤罷

官百姓奔走號泣乞留郡人胡廣力保之得還任民  
聞本忠復來空閭井迎拜永樂中卒官民哀慕留葬  
吉水爭負土營墳其得民如此

江南通志

萬鵬舉鎮江人洪武間為萬安縣丞廉平勤敏有豪民

劉仲賢殺鄉君瑞父子五人匿其屍鄉嫗執牒訴諸縣以無屍証弗錄鵬舉察其寃錄之俄有五蜂聚案如有訴復導往劉舍飛集竹坡劇之四屍如生惟失孩童一屍蜂復環繞悲鳴導至榆木下發得孩體已腐首猶可識乃具獄斬劉於市人以為神

豫章書

劉燦浙江人洪武間為萬安丞攝縣事翦滌民瘼有勾攝以一木牌疏其名去無不至者曲直得情獄無寃

民林志

朱仲智金華人洪武間知吉安府廉介自守刑清政簡  
吏畏民懷修學校獎掖生徒彬彬向學移重慶府吉  
民思之 豫章書

蘭芳夏縣人洪武中舉孝廉為刑部郎中永樂中出為  
吉安知府寬厚廉潔民甚德之吉水民詣闕言縣有  
銀礦帝遣官覆視父老遮芳訴曰聞宋季嘗有言此  
者卒以妄得罪今皆樹藝地安所得銀礦芳詰告者  
得實乃云貧不為鄉里所齒冀以此報耳芳具奏同

官不肯署名芳請獨任之奏上事得寢芳自奉甚約  
日疏食母甚賢芳日所治事暮必告母有不當母輒  
教戒之芳受命惟謹由是為良吏累官工部右侍郎  
白志

趙敏寧海人永樂末知安福縣公廉有幹局定民戶高  
下為科差量地里遠近約賦稅察料物輕重受納價  
賕鬪者記名懲之慎法者假容待之民翕然悅信既  
卒因家焉其孫璜為禮部尚書

林志

陳本深字有源鄞人永樂初由鄉舉入監授刑部主事  
遷員外郎擢吉安知府與況鍾莫愚羅以禮同受勅  
吉安多豪強好訐訟巨猾彭搏等十九人橫閭里本  
深密遣人與相結為具召與飲伏壯士後堂猝起拉  
殺之皆曳其屍以出一府大驚樂安大盜曾子良據  
大盤山衆萬餘本深設伏大破之斬子良本深為政  
舉大綱不屑苛細大猾既殲府中無事每晨起鼓而  
升堂吏無所白輒鼓而休間有所訟呼至榻前析曲

直遣之亦不受狀有抑不伸者雖三尺童子皆得往  
白久之民恥爭訟尤折節士人未嘗厭怠飾治學宮  
奏新先儒祠廟滿九載當遷郡人乞留詔予正三品  
俸解前民嫁女本深聞鼓樂聲笑曰吾來時乳下兒  
也今且嫁我尚留此邪遂請老前後守吉凡十八年  
既去郡人肖像祀之 白志

柯暹字用晦池州人洪熙元年知永新州訟牒盈庭徐  
折以一二語唯唯讐服暇召諸生講究經史廢修墜

舉民不知勞改吉水治猶永新民隱吏弊搜剔無遺

超擢浙江按察使民思之如失父母

林志

曹鼎字萬鍾寧晉人宣德間為泰和典史愛民如子每

以遠大自期因督工匠至京陳情願入鄉試果中經

魁明年廷試狀元及第

同上

陳義宜賓人宣德間知龍泉縣以廉潔稱民有餽魚者

斥不受曰此何為至於我哉楊文貞大書廉明二字

以嘉之

府志

何澄四川人正統間知安福縣廉靜豈弟嘗築寅坡浚

渠灌田民享其利

安志

李岫字景瞻高郵人正統三年知永豐縣剛介嚴明鋤  
擊豪右法無少貸勸富民出穀數萬斛以備賑濟有  
不便者以私誣之去邑民涕泣哀訴請留藩臬交章  
白其事乃復職

永豐縣志

張瑄字延璽江浦人正統進士景泰時為吉安知府俗  
尚巫迎神無休日瑄遇諸塗投神水中瑄遘危疾父



老皆言神為祟請復之瑄怒不許疾亦愈歲大饑陳  
牒上官不俟報輒發廩賑貸居八年以薦擢廣東右  
布政使歷官南京刑部尚書

白志

孫璋字景璋海寧人景泰壬申以賢良方正薦授泰和  
縣丞嘗親定徭役旦夕令下請托不及行人稱為霹  
靂手指其牒為鐵板榜言其公允不可更易也擢博  
白知縣韓襄毅雍征大藤峽璋從行多著勞績超授  
潯州知府擢山東右叅政致仕

浙江通志

程宗常熟人天順五年知吉安府才敏而不務苛察胥吏舞文者釐革殆盡嘗語健訟者曰汝能枉其是非以欺我邪汝將害人適自害耳郡中化之訟自息尤篤意學校勸督諸生罔有厭怠

林志

李智字若愚雲南昆明人成化間知吉水縣誠心愛民藥病者瘞死者尤加惠於貧困甲午夏恩江水驟漲衝決民居男婦漂流智下令諭兩岸小舟能救一人者賞一金全活無算仍給薪米遣歸後以禱雨行烈

日中得暴疾卒吏民哀思之貧不能返櫬葬邑之牢

橋子元方李方遂家焉

府志

李愷江陵人舉人知永新縣縣有梅花峒民梗化不供賦役者殆百年愷單騎至峒諭以利害擇數百人詣

縣充耆吏義官人皆感服擢吉安同知

湖廣通志

莊典揭陽人弘治間知安福縣事操履端潔政先大綱事必劄記以次第行之不假吏手義所必行直前不忌士大夫不敢干以私尤加意學校訓士子以道義

今祀名宦祠

安志

李如圭澧州人弘治間知安福縣事精敏有才惡民之  
獷悍而猾健者一治以猛由是奸民栗縮相顧不敢  
發其私先是田賦之籍漫漶不理貧者苦於虛懸而  
富連阡陌或仍籍畸零圭為稱其丁糧升降之民甚  
聳躍歷官戶部尚書

同上

吳景南陵人弘治末知安福明敏公廉獄訟紛沓立折  
惟允而不喜用鈎距曰吾自以詐而欲民不詐可乎

胥吏日悚息惟恐戾於法長雄之民據山洞片紙疏  
名攝之必立至諸大吏有不便民則堅持之曰吾不  
忍病下以阿上擢貳金華去

同上

張本錢唐人由進士弘治間知吉安府下車首擊武斷  
豪惡數人強暴斂跡表著節義請建楊文貞劉子輔  
譚節婦祠其為治知所先務類如此

林志

按吉安府志吉安鄉民有隙輒聚衆持梃至千人  
殺傷無所憚本奏請聚衆十人以上者俱發遠戍

民始警惴無敢犯者

陳茂烈莆田人弘治進士授吉安府推官簡重端潔動必以禮郡訟牒堆案從容推鞠不假聲色筆楚而姦黠者自無所容擢御史以母老乞終養家貧不能自給有司以聞詔給月廩三石母卒哀慟失明尋亦卒部使請於朝建孝廉坊以表之

同上

張淳字宗厚合肥人由進士弘治中知吉安府心清欲寡事不煩而民不擾自奉甚薄時勤民事日不暇給

胥吏抱文書立庭下如木偶人革富民隱射之弊差役為均解舍多圯撤而新之百廢具舉歷官至都御

史

府志

王昂字抑之揭陽人弘治間知永豐縣持廉秉公振作有道民有兄弟爭訟者將入庭恥之自平民俗初喪必椎牛釀酒以速弔客力不足稱貸以舉之昂導以禮教民俗少變毀淫祠增社學聚邑中子弟而教之凡事關風化者為之惟恐後邑人稱賢令必曰揭陽

公同上

馬鈺四明人弘治間知永寧縣廉幹通敏首禁師巫盡毀淫祠新廟學日聚諸生督訓之百廢具舉邑稱大

治同上

陸震字汝亨蘭谿人以學行知名正德進士除泰和知縣時劉瑾擅政以逋鹽課誣民縣中當償者萬計連數百人震力白之上官得免鎮守中官歲徵貢絀為減其額增築學舍居諸生毀淫祠祀忠節浮糧累民



稽賦籍得詭寄隱匿者萬五千石以補之建倉縣左  
儲穀待賑親行鄉落勸課農桑立保伍法使民備盜  
覺城七里外為土城十里周之時發狼兵討賊所至  
擾民震言於總督令毋聽樣舟官具糧糗以次續食  
兵行肅然督捕永豐新淦賊以功受賞撫按交薦徵  
為兵部主事泰和人生祠之

白志

周詔富順人正德進士知泰和縣時有巨寇廖贊戴鳳  
池與南贛諸賊連結四出無忌詔先後捕其渠魁殲

之餘黨置不問衆皆悅秩滿陞刑部主事民立祠祀之

府志

唐侃字廷直丹徒人正德八年舉於鄉授永豐知縣之官不攜妻子獨與一二童僕飯蔬豆羹以居吏民信服俗刁訟尚鬼尤好俳優侃禁止之進武定知州遷

刑部主事

白志

按皇明世法錄郡縣名臣傳載侃在永豐立木牌二面於庭左曰從刑右曰從化令曰從理者左欲

和者右久之民多立於右以求解言或當於理雖  
賤吏必改容謝無理雖權貴人百方請說終無所  
假借以是告訐之俗為之一變

原跋

王冕字服周洛陽人正德進士除萬安知縣寧王宸濠  
反列城長吏多奔竄冕募壯士從王守仁攻復南昌  
宸濠還兵鄱陽官軍戰不利冕獻火攻策敗其兵宸  
濠窘易小舟攜宮女遁冕部卒棹漁舟追及之宸濠  
投水不死并宮女執送冕所冕以送守仁功未及敘

坐他事落職世宗踐祚錄前功擢兵部主事

同上

何相字元卿貴池人正德丁丑進士知永新值逆濠反督府王守仁舉義討叛相集兵三千隸守仁而身居守事平守仁敘功相辭不受

江南通志

胡偉字邦奇京山人嘉靖元年知永新縣事興學勸農儲粟賑飢百廢咸舉邑歲賦苦虛賠民以藉輸多流亡偉疏奏量田更籍均其賦役命下豪右咸稱不便上官多沮其議偉力持之遂定計分都制籍因賦著

役不浹歲告成轉徙者復業民咸頌之

安志

陸築字浚明長洲人進士擢給事中以諫斥貶嘉靖十  
二年改永新令治政嚴明吏肅民畏有奸黨十數輩  
螫害良善廉其人置之法時寇煽諸境邑不逞朋起  
築盡擒殲之尤厚學校禮耆老倡鄉約民至今稱之

同上

許貫之字道卿錢塘人嘉靖乙未進士授吉水令時按  
浙使者吉水人也意有所屬即欲酬以浙事以微言

諷之貫之曰如此則類貿易有市心矣拒不可愛養  
部民煦之若子權貴干請一切謝絕由是吉水治行  
為江右冠徵入為兵科給事申入諫垣七日而歿行  
篋惟故衣同年親故代為殮之

浙江通志

王春復晉江人嘉靖戊戌進士知泰和縣禮士愛人查  
弊糧造徵總冊戶給之利及數世邑舊有淘金浩溪  
二驛去縣治各五十里供億甚繁民苦之乃請於撫  
院具奏併為白下驛費大省至今人思王侯

福建通

志

樂文解字廷冠以貢授吉安訓導從羅洪先講學與語  
忻然曰吾老友也署廬陵值歲饑著救荒解上當道  
行之邑賴不困擢鳳陽縣教諭雷州教授謝病歸

上

靳學顏字子魚濟寧人嘉靖進士為吉安守始下車罷  
諸供具與期會條教刑無妄施獄不濫繫食任粗糲  
器絕錯采未數月郡以無事吏晨起抱文書上堂印

署畢退坐舍中蕭然無他營郡中巨族造請必正色拒之嘗有乞佃寺地者學顏曰職守土固不能以地與人惟以正身宜民為急官至吏部侍郎

豫章書

危嶽嘉靖間為吉安推官剛毅有大節直道行志雖貴勢不撓署安福篆力行丈田豪猾不敢逞志嘗單騎入山谷間履畝抽丈不憚險阻自處淡泊無異儒生竟卒於官囊篋蕭然無以為斂士民哀之

府志

劉廷賓南海人嘉靖間通判吉安樸儉無欲其為政方



直絕請託嘗攝安福事時民間苦役廷賓簡易寡交  
游燕會稀少民當甲者至不費一錢捕劇盜搜獲金  
錢封識歸公帑秋毫不私家故貧廨舍蕭然泊如也

擢泉州同知

同上

張振之字仲起太倉人嘉靖進士為吉安知府以厚風  
俗興學校為首務諭屬邑省畊課桑禁溺女停喪不  
葬及迎神張燈競渡之習民間妖會號無為教熾甚  
嚴罪之逐娼優不得入境治獄主於矜恕不入贖大

辟重戍多從未減持已清約蕭然如寒士繕築敵臺以固城守構廬陵學時雨樓創永新忠節祠以風多士刻朱子年譜及羅整菴困知記以崇正學在郡三年忽不自憚遽棄官歸郡人思慕之尋起官至浙江

按察副使

豫章書

劉芳任泰和巡檢鄰境寇薄泰和芳力戰死副使汪一中率諸將吏特為文祭之

白志

按泰和縣志作劉茂濟南人

王應鵬為吉安所指揮僉事嘉靖辛酉程鄉賊掠泰和  
應鵬與百戶陳策領兵禦賊俱戰死事聞立祠加陞  
鵬子指揮同知

豫章書

唐鼎永新守禦所千戶嘉靖辛酉之亂鼎從征至泰和  
冠朝里力戰矢盡為賊所害贈官二級錄其子

同上

汪可受號靜峰黃州人由進士萬歷間知吉安府雅意  
興學修復白鷺書院徵輸便民造條鞭法樹碑郡門  
云官壞此法者官不職民梗此法者民弗良書吏舞

此法者遣定為例至今遵行之 安志

李樹敏揚州人萬厯間由恩貢授安福丞精敏能幹操  
執凜凜始至部使者督行田甚迫樹敏自治食具行  
阡陌間不煩民一饌會計精覈故事令入覲以丞攝  
篆姦民乘隙結訟敏獨持簡靜除夕有餽肉者家人  
誤受之既就鼎亟出以還餽者其清介絕俗類如此  
卒於官貧無以斂百姓醵錢助之柩乃得歸 同上

莊祖誥四川人萬厯進士任永新縣調繁廬陵廉介不

苟頌聲載道一日有布衣老者一童子執荆隨之傳  
柝而入祖誥迎老者上坐拜伏甚恭老者乃祖誥舅  
也曰吾商船便過此尊公屬我來廩汝政事有不善  
則予杖此荆乃尊公所授者今能如此可矣汝其益  
砥後操稍弗慎尊公知之反以我為誑也言畢拂衣  
去祖誥步行送之舟次由是益凜義方之訓

府志

明時舉四川人萬歷進士初授峽江令調繁廬陵以仁  
慈著聲甲寅歲饑設法賑賚全活無算請改折南兌

米邑賴以甦修葺縣治府學數擒大盜鄉村帖然

同

上

錢一本字國瑞武進人萬曆十一年進士除廬陵知縣徵授御史入臺即發原任江西巡按祝大舟貪墨狀請從祀曹端陳真晟羅倫羅洪先於文廟時廷臣相繼爭國本惟一本言最戇直帝銜之無何杖給事中孟養浩中旨以養浩所逞之詞根託一本遂斥為民一本初官江西與王時槐善及罷歸潛心六經濂洛

諸書尤研精易學與顧憲成輩分主東林講席學者  
稱啟新先生

白志

按府志縣志均失載此所採者雖亦無廬陵政績  
然其發祝大舟貪墨狀請祀羅洪先羅倫與王時

槐友善皆屬江西特補入

原跋

濮中玉號琢峰舒城人萬歷進士由長興更泰和縣為  
政威惠並用守正不阿積俸四百金為民償逋凡為  
民患者悉罷之置社田八百六十斛邑之貧不能得

師者皆就社學去官之日蕭然敝篋人皆稱之

安志

徐學聚字敬與蘭溪人萬歷進士任浮梁調吉水縣邑故多水患築堤堅固水不為災民稱為徐公堤里長輸納無纖毫奇羨丁亥戊子饑設法賑濟又蠲俸勑仁文書院擢禮科給事中

吉水志

王元瑞字心岫華亭人萬歷進士任泰和縣愷悌樂易不事苛刻捐俸築堤邑人德之至今稱為王公堤

安志



夏九鼎嘉善人萬歷進士任安福縣嘗慕豐城李見羅  
為人遵而行之一言一動皆密有疏記撫民如子待  
士大夫以禮莫敢干以私時稱為夏鐵耳

府志

陸康稷蘇州人萬歷進士天啓間任廬陵縣性廉而察  
善決疑獄養濟院丐兒素橫有富家毆丐遂以殺丐  
訟昇屍至縣康稷驗屍口中有土指為掘死人以誣  
告丐吐實服罪一邑奇之內擢將行值編審悉心審  
定而後去

安志

余懋衡號少原婺源人萬歷進士知永新縣興利除害  
初邑學徙置西南隅羣稱不善於是捐俸復創于治  
東故址又創明新書院講求實用之學置田以資師  
儒供膳建崇閣於浮玉州屹然為中流之柱立官解  
之法以甦民困大吏下其法於諸郡江省之有官解  
自衡始也崇祀名宦祠

同上

閔世翔字仲升烏程人萬歷進士任安福縣性坦率不  
設城府會歲饑躬詣賑濟勸率富民出粟有法又時

方丈田慮邑賦漫漶吏得影射任一二布衣儒士有  
學行者主之老吏束手至為蜚語撼之終不動賦賴  
以清陞南工部主事去士民遮道泣送

浙江通志

瞿式耜字起田常熟人萬歷進士知永豐縣政尚寬仁  
捐貲建尊經堂三元堂立恩江書院刻龍華彙雋若

干卷

縣志

余玉節字振衡大冶人萬歷進士知吉安講求馬驛漕  
艘為畫一之法以蘇民困時欲廢白鷺洲書院以建

魏忠賢生祠節力存之妖賊肆逞兩臺奏留叅藩單  
車就道簡將士足糗糧嚴斥堠方略出奇屢劔賊鋒  
擢南贛巡撫竟以勞瘁卒

湖廣通志

高賚明廣東人進士天啓間知安福縣有惠政時魏璫  
毀天下書院建生祠邑有復古復禮諸書院皆在毀  
中賚明曰復古祀王文成湛甘泉鄒文莊文成學問  
事功在天下毀之則得罪名教甘泉為粵儒宗某粵  
人毀之則得罪鄉先達文莊為安福理學開先毀之

則得罪地方寧死不敢為諸書院歸然得存邑人至

今頌之

安志

管正傳號德園蘇州人崇禎辛未進士方弱冠負才名  
及令永新悉心問民疾苦力為罷革禁竿牘絕苞苴  
尤折節下士手自課程多所成就至設彙封定官造  
歸條編毀淫祠至今猶守之云

同上

邵夢河廣東人崇禎間吉安府通判署安福縣事張獻  
忠寇陷郡邑且將及境夢河慷慨登陴守禦勢不可

支遂遇害邑民得餘骸殯之建忠節祠祀之

同上

劉綿祚字季延武進人崇禎四年進士為永豐知縣鄰境九蓮山界閩粵賊窟其中綿祚屢請兵會勦賊怒率衆來攻綿祚出擊三戰三捷賊益大至綿祚伏兵黃牛峒誘賊復大破之縣境以安因積勞得疾請告

歸卒

白志

陸運昌字夢鶴崇禎七年進士授永豐知縣請免積逋數萬及調吉水修飭學宮虛懷下士清軍審丁不辭

勞怨值寇警親運磚石以倡城守邑民賴之

永豐志

梁于溪字飲光揚州人有文名崇禎進士任萬安縣慷慨持大節縣當倥傯兵馬絡繹措置有方山寇圍城登陴誓守城壞整衣冠拜畢投水死邑人哀之

安志

按萬安縣志于溪莅政八月值國難作以守城就縛不屈繫獄數月絕粒而死所載互異

國朝

蔣維藩字价人順治初知吉安府時所在山寇肆劫維

藩單騎詣賊營諭以禍福就撫者數萬人亂後田疇  
荒蕪民苦飢復捐米千餘石設粥賑之全活甚衆瘡  
痍頓復乃創書院課諸生士風大振焉

府志

趙世猷順天人順治初任安福知縣兵燹後捐去一切  
文法與民休息丁亥大饑石米七金多方拯救煮米  
賑活甚衆游兵入境搶掠世猷力戢之士民感其德

安福志

薛世瑞字執躬范縣人順治初由貢授龍泉令時吉安



初破不軌之徒多竄身營伍肆掠環城十餘里燒燬殆盡世瑞日往來諸營民被掠者輒救出之力請緩徵以甦民困戊子大饑世瑞亦每食不飽嘗市甦麥不可得至夜乃一食其清操愛民如此

安志

儲曾字觀我宜興人順治己丑進士知永豐縣時多盜曾擒渠首誅之寇悉平兵有奪民財者寘諸獄其黨五人自稱提標官捧檄索獄中兵曾識其詐并執付獄訊伏法自是驕兵斂跡明靖難魏冕子孫隸所衛

戍伍曾搜舊牒除其籍以民逋糧免歸越一年奉檄  
回豐清額欠境上有民挈妻迎拜車下者問故則向  
有豪欲奪民妻訟諸官曾斷歸民至是生男女各一  
故尸祝不忘云

江南通志

鄧秉恒號忍菴聊城人順治己丑進士任永豐縣釐姦  
剔蠹發伏如神山寇盤踞率鄉勇蕩平之建恩江橋  
民稱便吉郡食廣鹽鼎革後鹽不行而課存秉恒內  
召疏免廣課闔郡德之

永豐志

蕭恒字月如三原人順治壬辰進士任安福縣邑田水衝沙塞多虛糧力請直指題減糧千餘石至今賴之

安志

閻毓偉字翼望夏縣人順治壬辰進士授吉安府推官案鞫悉中民無後言吏捕礦徒二十餘人應論死毓偉廉得其情寘首於法餘盡釋之以廉敏入為吏部

主事

山西通志

焦榮號荆巖新野人順治乙未進士知安福縣性嚴毅

持法不撓盜竊以輯邑舊無志榮以安福叢錄福乘  
藏藁兩書捐俸重修考覈詳贍擢御史

安福志

李徵泰字晦修山東長山人順治戊戌進士令永豐始  
至即於內堂署冰心若水執法如山八字豪猾憚之  
時南寇未靖招徠之兵令就州縣屯墾至則強占民  
田民屏息莫敢與爭徵泰力請於大吏撤去民得以  
蘇在事四載衙齋蕭然以勤勞卒官邑人建遺愛祠  
至今祀之

永豐志

馮肇楠字木伯會稽人順治戊戌進士任永豐縣寧都蓮花峰盜擁衆負險諸邑患之肇楠單騎詣賊營格以至誠賊衆羅拜就撫尋被議免官去士民惜之永

豐志

高可極字爾建潛山人以歲薦任永豐令甫下車即詳食鹽免充廣餉捐買馬不起民夫捐俸鼎建歐陽文忠公祠以老病去任士民焚香泣送者數十里

江南

通志

張召南字仲文朝邑人順治進士知安福縣西鄙阻遠  
民抗不供役乃單騎往諭以大義咸感泣輸賦吳逆  
偽將出江西陷安福召南請制府兵復之時議分滿  
兵駐安福召南力陳不可後以職事赴會城賊突至  
城復陷立馳歸集鄉勇臨城賊遁城再復招撫瘡痍  
馴服頑梗勸諭開墾散給牛種得田二千餘頃內擢  
未任卒

陝西通志

顓孫佐聖徐州人由貢生康熙四年任泰和縣審丁清

丈開豁虛糧造赤厯以杜虛懸逋欠之弊奉發福建  
降兵安插屯田佐聖力請中止人咸德之

泰和志

龔其裕字溶溪福建人先任瑞州通判以才能攝府事  
滇閩之變草寇充斥其裕選鄉勇申號令寇為屏跡  
隨征行間有功陞吉安知府時城已為逆將韓大任  
所踞征勦兵衆駐螺山坡連歲裕給軍需有方民以  
安堵初城陷寇殺人遍野城復後裕捐貲給僧令瘞  
埋撫瘡痍如不及兩郡皆祀名宦

崇祀錄

陳復新字煥然潞城人任廬陵典史滇逆方肆赴任賊兵遽至官民駭散遂為所執偽將韓大任委以官不受羈民舍以兵守之復新乘間令僕亡去自經死賊黨哀其忠斂以棺事平其子始迎櫬歸葬祀廬陵名

宦


山西通志

陸在新字文蔚長洲人舉人康熙二十五年令廬陵有威稜境內帖然縣治前建問苦亭諮民疾苦催科有法尤禮士自奉若寒素卒官邑罷市三日白衣冠哭



送者填道

江南通志



江西通志卷六十一